

ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O 31 DE XULLO DE 2014, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 31 DE XULLO DE 2014.-

No Salón de Sesións da Casa do Concello de Ames, ás vinte horas (20:00) do día 31 de xullo de 2014, reúnese o Pleno do Concello en sesión ordinaria de primeira convocatoria, baixo a presidencia do señor alcalde, **Santiago V. Amor Barreiro**, e coa asistencia das/os señoras/os concelleiras/os seguintes:

Grupo municipal Popular	Grupo municipal Socialista	Concelleiras/os non adscritas/os
Santiago V. Amor Barreiro Mª Eugenia Martín Vicente Bernardo Moar Míguez Alfredo Taboada Alvelo Mª Carmen Verde Leboráns	José Manuel Miñones Conde José Blas García Piñeiro Mª Isabel González Canela Carmen Fraga Crespo Francisco Villaverde Marcos	Olalla Alvite del Río María Pilar Candocia Pita Xosé Anxo Doval Rey Susana Mayo Redondo Ramón García Argibay Mª Dolores Fernández Álvarez Manuel J. Ferreiro Santiago Alfonso Rey López Emilio Martínez Carballeira

Non asiste pero xustifica a súa ausencia o concelleiro **José Pazos Balsa** e a concelleira non adscrita, **María González Gómez**.

Non asiste o señor interventor.

Actúa como **secretaría** a titular da Corporación, Rosa Ana Prada Queipo.

ORDE DO DÍA:**A) PARA DAR CONTA:****Punto primeiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria.**

O señor alcalde, **Santiago V. Amor Barreiro**, informa á Corporación que os decretos ditados pola Alcaldía dende a última sesión plenaria ordinaria estiveron á disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello así como nos distintos departamentos nos que foron elaborados e que ditos decretos foron remitidos por vía telemática aos señores/as concelleiros/as.

Punto segundo.- Dación de conta ao Pleno da Corporación do decreto de aprobación da liquidación 2013.

O señor alcalde, **Santiago V. Amor Barreiro**, da conta ao Pleno da Corporación do decreto 1456/2014 de 30 de xuño de 2014, de aprobación da liquidación orzamentaria correspondente ao exercicio 2013, así como do informe de Intervención municipal 141/2014, referente á liquidación orzamentaria exercicio 2013, obrante no expediente.

Punto Terceiro.- Información periódica a render ao Pleno, en execución do acordo adoptado en data 26/08/2010: Execución do orzamento ao remate do 2º trimestre do exercicio 2014.

O señor alcalde, **Santiago V. Amor Barreiro**, da conta da información periódica a render

ao pleno en execución do acordo adoptado en data 14/10/2013: Execución do orzamento ao remate do 2º trimestre do exercicio 2014, de acordo co informe 07/2014 da intervención municipal emitido en data 21 de abril de 2014, e a documentación en formato dixital que se xunta a aquel.

Punto cuarto.- Información ao pleno, en execución do disposto no artigo 4.3 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, informe sobre o cumprimento dos prazos previstos no artigo 216.4 do Real decreto lexislativo 3/2011, de 14 de novembro, polo que se aproba o texto refundido da Lei de contratos do sector público, para o pago das obrigas de cada Entidade local, correspondente ao 2º trimestre do exercicio 2014.

O señor alcalde, **Santiago V. Amor Barreiro**, da conta da información ao pleno, en execución do disposto no artigo 4.3 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, informe sobre o cumprimento dos prazos previstos no artigo 216.4 do Real Decreto Lexislativo 3/2011, de 14 de novembro, polo que se aproba o Texto Refundido da Lei de contratos do sector público, para o pago das obrigas de cada entidade local, correspondente ao 2º trimestre do exercicio 2014, de acordo co informe 71/2014 de Intervención municipal emitido o 21 de abril de 2014 e documentación en formato dixital que se xunta a aquel.

Punto quinto.- Información ao pleno, en execución do disposto no artigo 5.4 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, relación de facturas que presentan unha demora na tramitación superior aos tres meses, correspondente ao 2º trimestre do exercicio 2014.

O señor alcalde, **Santiago V. Amor Barreiro**, da conta da información ao pleno, en execución do disposto no artigo 5.4 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas relacións comerciais, relación de facturas que presentan unha demora na tramitación superior aos tres meses, correspondente ao 2º trimestre do exercicio 2014, de acordo co informe de Intervención municipal 71/2014, emitido en data 21 de abril de 2014 e a documentación en formato dixital que se xunta a aquel.

B) PARA DELIBERACIÓN E ACORDO:

Punto sexto.- Aprobación de actas anteriores.

Sometida a votación, a acta correspondente á sesión ordinaria de 5 de xuño de 2014, resulta aprobada por unanimidade dos membros presentes da corporación municipal.

Sometida a votación, a acta correspondente á sesión ordinaria de 26 de xuño de 2014, resulta aprobada por maioría absoluta do número legal de membros presentes da corporación municipal, coa abstención de Mª Pilar Candocia Pita por non ter estado presente na totalidade da sesión plenaria e o voto a favor do resto de concelleiros/as presentes da corporación municipal.

Punto sétimo.- Fixación dos festivos locais para o ano 2015.

(.....)

Rematadas as intervencións o pleno da corporación por unanimidade dos seus membros presentes acorda:

Fixar como festivos locais no Concello de Ames para o ano 2015 o día da Ascensión (14 de maio) e o día de San Xoán (24 de xuño) dando traslado á Xefatura Territorial de Traballo e Benestar da Xunta de Galicia para a confección do calendario laboral do ano 2015.

C) PARA CONTROL DO GOBERNO:

Punto oitavo.- Moción dos concelleiros Mª Dolores Fernández Álvarez, Alfonso Rey López, María González Gómez, Manuel José Ferreiro Santiago, Emilio Martínez

Carballeira e Ramón García Argibay sobre o Camiño de Santiago ao paso por Ames, na zona do Milladoiro e Trasmonte.

O alcalde concede a palabra a un dos concelleiros propoñentes da moción, **Alfonso Rey López**, que comeza dando lectura á parte final da moción.

Sobre os camiños de Santiago, o camiño Portugués e o camiño de Fisterra que pasan polo Concello de Ames PxA propón:

1.- Instar á Xunta de Galicia, e máis en concreto á Consellería de Cultura, Educación e Ordenación Universitaria para que poña os medios necesarios, en colaboración con Concello de Ames, para que se arranxe o trazado que discorre pola Travesía do Porto de xeito que se faga unha zona diferenciada pola que poidan transitar os peregrinos.

2.- Instar á Xunta de Galicia, e máis en concreto á Consellería de Cultura, Educación e Ordenación Universitaria para que poña os medios necesarios, en colaboración con Concello de Ames, para que se arranxe o trazado que discorre por Trasmonte – Ponte Maceira para que se faga unha zona diferenciada pola que poidan transitar os peregrinos que fan a ruta do Camiño de Santiago a Fisterra con total seguridade.

3.- Instar á Deputación da Coruña e a Consellería de Cultura, Educación e Ordenación Universitaria para que en colaboración co Concello de Teo e Ames, poña os medios necesarios para que o trazado do Camiño Portugués que discorre entre a Grela e a Travesía do Porto, teña un trazado diferenciado para os peregrinos así como a mellora da seguridade dotándoa tamén de pasos de peóns e sinalización axeitada.

4.- Facultar ao alcalde do Concello de Ames para que realice todos os trámites necesarios nas xestións inherentes a este tema.

5.- Que a partir da aprobación de esta moción, se informe nos sucesivos plenos ordinarios do estado das xestións relacionadas.

O **alcalde** abre unha quenda de intervencións, comezando **Francisco Villaverde Marcos**, que di: Esta moción ten bastante importancia xa que polo Milladoiro discorre un tramo do Camiño Portugués de Santiago. Aínda que é un tramo pequeno, conta con problemas de delimitación e de sinalización, para poder diferenciar ben por onde pasa o camiño.

O que eu vexo e vivo é que dende o Alto do Vento ata Ponte Maceira, nesta época, hai unha gran afluencia de peregrinos. O xoves pasado fun a Negreira, e cando baixaba dende o Lombao a Augapesada, contei 22 peregrinos. Á volta, cando volvía de Augapesada – Lombao había 12 peregrinos, isto nun momento determinado, e pode ser que agora ao día estean pasando 60 ou mais de 100 peregrinos por aí.

O camiño non está moi ben sinalizado, pero tamén hai que dicir que hai zonas que non discorren pola estrada que están ben, por exemplo, dende o Alto do Vento ata Augapesada hai beirarrúas que están ben. Pero logo, desde a desviación que hai a Augapesada arriba de Castiñeiro do Lobo, quédanos toda a subida ata Carballo e Trasmonte e de Carballo a Ponte Maceira que discorre pola estrada municipal, e é estreita e crea un perigo grave para os peregrinos e para as persoas que circulan no vehículo. O ideal sería que nesa zona se fixera unha senda peonil, para que os peregrinos puideran discorrer polo lado da estrada sen perigo ningún. Debido ao aumento de peregrinos, sería importante que o concello se esforzada en esixir, neste caso á Xunta, que se fixera esta senda.

Intervén, co permiso da presidencia **Bernardo Moar Míguez** para dicir: Para nós tamén é unha preocupación os camiños de Santiago que discorren polo Concello de Ames. De feito, fixéronse traballos de mantemento no camiño de Santiago-Fisterra por parte da Xunta de Galicia e no tramo do camiño Portugués por parte da brigada municipal de obras. A parte diso, o goberno municipal tivo reunións co Concello de Teo e cos Amigos do Camiño

Portugués, unha asociación recentemente creada para tratar de buscar melloras neste senso. Por outra banda, hai que ter en conta que por primeira vez por parte da Xunta de Galicia se puxo en marcha un plan estratéxico, “Plan Director Estratéxico do Camiño de Santiago”, que ten obxectivos claros, como a correcta atención das rutas de peregrinación, fixar as accións que se van a desenvolver de cara a preservar a esencia do camiño de Santiago, tendo en conta todos estes factores que inflúen nel e definir as relacións dos axentes implicados.

O Plan Director do Camiño pretende revitalizar, promocionar e promover o estudio de investigación das rutas xacobeas. Eu creo que é algo que se esta poñendo en marcha, é unha preocupación dos concellos e da Xunta de Galicia; nesta liña o Concello de Ames está facendo os deberes.

Intervén, co permiso da presidencia **Alfonso Rey López** para dicir: O que se acaba de dicir aquí parece que é importante e estou totalmente de acordo coas exposicións feitas, tanto polo grupo socialista como polo grupo popular.

Pero eu creo que se un ten unha idea clara do que quere no ámbito de actuación, neste caso falamos de Patrimonio, se está claro o programa sobre o que facer ao respecto do patrimonio en Ames o primeiro é que debería estar recollido nalgunha parte, xa que isto non é unha cuestión de improvisación senón de ver o que podemos facer. É importante ter un plan de actuación en Patrimonio. A nosa moción vai no sentido de que debería existir ese plan e neste caso nós falamos dos camiños de Santiago, do Portugués, o segundo en importancia é o de Fisterra que está collendo unha importancia capital, aínda que parecía que era mais un camiño de continuidade para un peregrino que chegaba a Compostela e despois ía a Fisterra, ao Cabo do Fin do Mundo.

Px a o que bota en falta é ese plan global sobre o tratamento que debe ter o Patrimonio. Neste caso, Patrimonio referido aos camiños de Santiago, pero Patrimonio é un concepto moito mais amplo. Patrimonio é todo aquilo que herdamos dos nosos antepasados, pero non so a nivel de edificacións e de camiños, tamén herdamos paisaxes, medio ambiente etc. Pero hai moitos mais elementos do Patrimonio que están abandonados sen ningún plan de actuación na súa defensa, como poden ser os pombais, hórreos ou a conservación das aldeas tradicionais. Para todo iso eu boto en falta un plan. Pero tamén boto en falta que se arranxen e que se limpen os camiños e se sinalicen correctamente e se fagan algunhas actuacións.

Debería haber un plan de actuación en Patrimonio pero supoño que a estas alturas da historia xa é un pouco tarde para pedilo, eu sei que o houbos, o que pasa é que tamén houbos desidia e isto é o que mais me preocupa. Eu o que reclamo neste momento son esas actuacións, pero tamén un plan sobre Patrimonio que ten que ser un ben socioeconómico para o Concello de Ames, por outra parte ao lado do Concello de Santiago. Nós non podemos competir coa Catedral de Santiago, pero si podemos competir en paisaxes, no ámbito rural, no medio ambiente, etc. e iso é o que reclamo.

Rematadas as intervencións o pleno da corporación por maioría absoluta do número legal de membros coa abstención dos 5 representantes do grupo municipal popular e o voto favorable do resto dos concelleiros presentes presta aprobación á moción presentada polos concelleiros/as M^a Dolores Fernández Álvarez, Alfonso Rey López, María González Gómez, Manuel José Ferreiro Santiago, Emilio Martínez Carballeira e Ramón García Argibay do teor literal seguinte:

EXPOSICIÓN DE MOTIVOS.

Polo Milladoiro discorre un tramo do Camiño Portugués de Santiago, é un itinerario moi frecuentado polos peregrinos que cruzan a nosa localidade no último tramo antes de chegar a Compostela e que entra no noso concello a través de Raíces e a Grela, seguindo pola Travesía do Porto.

O Milladoiro conta cun férreo e tradicional pasado xacobeo. De feito, o nome de Milladoiro deriva do termo latino Humillatorium, cuxa definición máis arraigada relacionaban cos lugares no que os peregrinos xa percibían a cidade de Compostela e as torres da catedral,

polo que se axeonllaban para dar grazas a Deus.

O tramo que vai da Grela e continúa pola Travesía do Porto presenta numerosas deficiencias tanto no trazado como na sinalización e seguridade.

Este tramo (en parte compartido polo concello de Teo), non contempla un camiño definido no seu percorrido aos marxes da estrada para os peregrinos, sendo este incómodo, inseguro e inapropiado.

Unha vez que os peregrinos cruzan ata o inicio da Travesía do Porto, o trazado empeora considerablemente porque non hai beirarrúas no marxe esquerdo, o chan está cheo de fochas e fochancas e os vehículos estacionados impiden o paso aos peregrinos que teñen que invadir a calzada. Non hai paso de peóns para cruzar a marxe dereita (para cruzar a capela da Madalena por exemplo), e carece de calquera sinalización informativa (salvo o indicador de dilección e quilómetro).

A marxe esquerda é a ruta natural pola que circulan os peregrinos e o percorrido pola Travesía do Porto está lonxe de ser a mellor imaxe que deberíamos proxectar para o percorrer da ruta fora atractiva e que ademais invitara a unha parada no Milladoiro.

Nunha situación similar atópase o trazado do Camiño de Santiago a Fisterra ao paso por Trasmonte, xa que dende a saída do comiño de arriba de Castiñeiro do Lobo e ata a Ponte Maceira, o percorrido é pola estrada sen ningún tipo de senda, beiravía ou camiño diferenciado.

Mentres que noutros concellos esfórzanse en planificar actividades turísticas, culturais, gastronómicas ou de tempo de lecer para intentar captar a atención dos peregrinos, en Ames estas políticas simplemente non existen.

Mentres que noutras localidades teñen políticas de dinamización do camiño, esfórzanse en facer agradable a estancia e/ou a rúa e fan esforzos por coidar os trazados polos que discorre o camiño de Santiago, en Ames, e máis concretamente no Milladoiro, nin pola concelleira de promoción económica e turismo nin pola concelleira de cultura, nin pola de patrimonio se fixo ningunha actuación ao respecto que faga atractivo para os peregrinos o seu paso ou que incluso invite a facer unha parada.

Por este motivo, os concelleiros de PxA presentamos ao pleno da corporación a seguinte
MOCIÓN:

1.- Instar á Xunta de Galicia, e máis en concreto á Consellería de Cultura, Educación e Ordenación Universitaria para que poña os medios necesarios, en colaboración con Concello de Ames, para que se arranxe o trazado que discorre pola Travesía do Porto de xeito que se faga unha zona diferenciada pola que poidan transitar os peregrinos.

2.- Instar á Xunta de Galicia, e máis en concreto á Consellería de Cultura, Educación e Ordenación Universitaria para que poña os medios necesarios, en colaboración con Concello de Ames, para que se arranxe o trazado que discorre por Trasmonte – Ponte Maceira para que se faga unha zona diferenciada pola que poidan transitar os peregrinos que fan a ruta do Camiño de Santiago a Fisterra con total seguridade.

3.- Instar á Deputación da Coruña e a Consellería de Cultura, Educación e Ordenación Universitaria para que en colaboración co Concello de Teo e Ames, poña os medios necesarios para que o trazado do Camiño Portugués que discorre entre a Grela e a Travesía do Porto, teña un trazado diferenciado para os peregrinos así como a mellora da seguridade dotándoa tamén de pasos de peóns e sinalización axeitada.

4.- Facultar ai alcalde do Concello de Ames para que realice todos os trámites necesarios nas xestións inherentes a este tema.

5.- Que a partir da aprobación de esta moción, se informe nos sucesivos plenos ordinarios do estado das xestións relacionadas.

Punto noveno.- Moción do grupo municipal socialista sobre a defensa dos rexistros civís e en contra da privatización do servizo.

Toma a palabra o **alcalde** para informar de que hai unha emenda presentada.

O alcalde concede a palabra a un dos concelleiros propoñentes da moción, **José Blas García Piñeiro**, que comeza a súa intervención dando lectura á moción.

Intervén, co permiso da presidencia, **Mª Dolores Fernández Álvarez**, que di: Nosotros estamos de acordo con la moción y anunciamos, tal cual está la moción, nuestro voto afirmativo.

Intervén, co permiso da presidencia, **Bernardo Moar**, que comeza a súa intervención dando lectura á emenda:

O grupo municipal popular do Concello de Ames, en base ó disposto no artigo 97.5 do Regulamento de organización, funcionamento e réxime xurídico das entidades locais e demais normativa que poida resultar de aplicación, realiza a seguinte emenda transaccional ó respecto da propostas de acordo:

Punto primeiro.- Instar ao goberno central a que as reformas legais que se adopten garantan unha Administración de Xustiza eficaz e próxima aos cidadáns, ao aproveitamento das vantaxes das novas tecnoloxías e a que as principais xestións que se leven a cabo no Rexistro Civil, como as inscricións de nacementos e as actas de defunción, sigan tendo un carácter gratuito.

Punto segundo.- Dar traslado do presente acordo a todos os grupos con representación no Congreso dos Deputados.

Intervén **José Blas García Piñeiro** para dicir: Pola nosa parte, non aceptamos a emenda, vai en contra do sentido da moción en si.

Rematadas as intervencións, sometese a votación a emenda presentada polo grupo municipal popular, que resulta rexeitada por maioría absoluta do número legal de membros, cos votos a favor dos 5 representantes do grupo municipal popular e o voto en contra do resto de concelleiros presentes da corporación municipal.

Sometida a votación a moción presentada polo grupo municipal socialista sobre a defensa dos rexistros civís e en contra da privatización do servizo, resulta aprobada por maioría absoluta do número legal de membros, coa abstención dos 5 representantes do grupo municipal popular e co voto a favor do resto de concelleiros presentes da corporación municipal, sendo a moción aprobada do teor literal seguinte:

Exposición de motivos.

O Goberno que preside Mariano Rajoy vén de aprobar no Consello de Ministros do pasado venres día 4 de xullo o "Real Decreto Ley 8/2014 de Aprobación de Medidas Urgentes para el Crecimiento, la Competitividad y la Eficiencia", o cal xa foi publicado no Boletín Oficial do Estado (BOE) ao día seguinte. Este Real Decreto, entre outras medidas de interese como a regulación dos horarios e a apertura nos comercios, os límites as taxas nos pagos en comercios con tarxetas de crédito, a privatización de AENA e as tarifas aeroportuarias, a liberación dos prezos enerxéticos, a regulación dos drones, etc. tamén regula a competencia do Rexistro Civil, que pasará a ser responsabilidade dos rexistradores que teñan ao seu cargo as oficinas do Rexistro Mercantil.

Ata o de agora a expedición de certificacións rexistrais realizábanse na súa maioría de maneira directa nas dependencias dos Rexistros Civís ou nos Xulgados de Paz nas propias localidades; no caso de Ames estamos a falar de máis de 5000 certificacións ao ano, as cales se realizan dependencias do Xulgado de Paz amienses, é dicir o servizo préstase de xeito directo e inmediato (agás aquelas que precisan ser apostiladas polo Tribuna Superior de Xustiza, ou aquelas outras que se estenden sobre documentos doutros países).

Ademais o Real Decreto 8/2014 establece na súa Disposición adicional décimo novena sobre a Prórroga da entrada en vigor da Ley 20/2011, que regula o Rexistro Civil, que a data límite para a aplicación do disposto será o día 15 de xullo de 2015. Polo que tras a decisión por parte do goberno de Mariano Rajoy de entregarlle o Rexistro Civil aos Rexistradores Mercantís supón que os cidadáns do concello de Ames, ao igual que o da maioría dos concellos, terán que desprazarse a unha cidade na que exista Rexistro Mercantil para realizar os trámites relativos aos expedientes rexistrais ou outra certificación que precisen, o cal ocasionará outro trastorno e dificultade a maiores para os e as cidadás, aos que cada día se lle infrinxen máis castigos por parte do goberno do Partido Popular poñéndolle constantes trabas e obstáculos para poder achegarse á administración. Está claro que o Goberno de presidente Rajoy e o ministro Gallardón con esta modificación só conseguen afastar un servizo público da sociedade e crearlle un custe adicional aos cidadáns.

Este é un paso para a privatización do Rexistro Civil, posto que os Rexistradores Mercantís, a pesares de ser funcionarios públicos actúan como empresas privadas, xa que os seus ingresos non proceden dos Presupostos Xerais do Estado, senón dos aranceis que lle cobran aos seus clientes, e polo tanto son a todos os efectos empresas privadas que ademais actúan como tales. A Disposición Adicional vixésimo segunda di que se creará unha "Corporación de Derecho Público", a encargada da contratación, xestión, mantemento, conservación e actualización do sistema informático que xestionará e almacenará os datos de todas as oficinas do Rexistro Civil. Esta "Corporación de Derecho Público" terá personalidade xurídica propia e plena capacidade xurídica para o cumprimento dos seus fins, e estará formada polos rexistradores que en cada momento resulten responsables da levanza dos Rexistros Cívís e Mercantís. Polo que, os datos de millóns de persoas se poñerán en mans de empresas privadas que se encargarán de xestionalos e custodialos.

A este entorpecemento e privatización do servizo hai que engadir os miles de postos de traballo que se destruírán, xa que os sindicatos denuncian a incerteza dos 2.500 funcionarios que traballan nos Rexistros Cívís de toda España, aos que hai que sumar o risco que no emprego para outros 2.500 interinos que traballan nos xulgados e tribunais.

En definitiva, o Real Decreto 8/2014 supón a defunción do servizo público que era o Rexistro Civil, e a partir de agora un acto como inscribir un nacemento, unha defunción, un matrimonio, unha separación, un divorcio ou cambiar o nome e os apelidos vai a significar un novo atranco para a cidadanía por culpa dun goberno que só pretende destruír e rematar co servizo público da xustiza. Porque a esta decisión hai que sumarlle as desgraciadas medidas da Lei de Taxas e os recortes na Xustiza Gratuíta coa cal se impedía o acceso a centos de miles de persoas ao sistema xudicial, ademais de crear unha desigualdade ao convertela nunha xustiza para ricos. E posteriormente coa Lei Orgánica do Poder Xudicial que arrasará coa xustiza de proximidade e destruírá numerosos edificios xudiciais.

Pero o peor de todo é que esta modificación dos Rexistros Cívís se agache nun Real Decreto Lei de 170 páxinas, no que se abordan cuestións que afectan a oito ministerios, e que a parte sobre a privatización dos Rexistros aparece tan unicamente en seis disposicións adicionais e unha final, y só en seis parágrafos da exposición de motivos que ten una extensión de 30 páxinas; ademais de orixinar as protestas, non só dos grupos políticos da oposición, senón tamén de sindicatos, colectivos de xuíces e secretarios xudiciais e incluso do propio Colexio de Rexistradores da Propiedade e Mercantís porque foi imposto sen ningún diálogo nin negociación.

Por todo o anteriormente exposto é polo que **SOLICITAMOS**

1.- Instar ao Goberno de España a que elimine as Disposicións Adicionais décimo novena, vixésima, vixésimo primeira, vixésimo segunda, vixésimo terceira, vixésimo cuarta e a Disposición Final 8 do "Real Decreto Ley 8/2014 de Aprobación de Medidas Urgentes para el Crecimiento, la Competitividad y la Eficiencia" pola que se modifica a Lei 20/2011, de 21 de xullo, do Rexistro Civil.

2.- Dar traslado do presente acordo a todos os grupos con representación no Congreso do Deputados.

Punto decimo.- Rogos e Preguntas.

Rogos.-

Intervén a concelleira **Mª Pilar Candocia Pita** para formular os seguintes rogos:

Primeiro rogo.- A finca detrás do Bar Galerna, a finca que linda co parque segue sen limpar. Non debería de ser necesario estar recordando que hai que limpala cada vez que medra a herba, o que acordáramos aquí era que se o propietario non limpaba que a limpase o Concello e que lle pasase os custes, pero hai que facelo de maneira xeneralizada. Hai dúas fincas que lindan cos edificios, e iso ademais afea o parque, polo que non ten ningún sentido ter iso así. Polo tanto, rogo que se fagan cargo diso e que se limpe regularmente.

Segundo rogo.- Que se actualicen na paxina web os cans que se recolleron e que entraron na canceira. Nos consta que non está actualizado e así nolo advirten as asociacións de animais que actúan en Ames. Recórdolle ao goberno que tiña un acordo plenario (pactado antes coas asociacións de animais), onde se pactaron unhas condicións, e así consta na acta. Unha desas condicións era que nos ían pasar mensualmente un listado dos animais que entraban e saían, e a día de hoxe, desde logo aos non adscritos do grupo político Ames Novo, porque teñen algún problema cos "ex BNG", aínda que Ramón Millares que é un home intelixente di que a condición de "ex" non se perde nunca, pero que a condición de "ser" pódese perder entón, nese sentido non nos parece mal que nos chamen do ex BNG, pero tamén lle recordo que parece que ten un pouco de fixación, e sobre este tema non recibimos nada. Estas tres concelleiras e este concelleiro, non recibimos ningunha notificación de ningún listado mensual de ningún mes de todo este tempo, desde que se aprobou a licitación. Pregamos que cumpra as cousas que se traen a este pleno, e esa en concreto.

Contesta o **alcalde**, dicindo: En referencia ao das fincas, hai varios expedientes abertos. O do parque Ameneiral foi un expediente que se abriu no mes de abril e se notificou; presentaron alegacións, se volveu a dar tramite de audiencia e agora teñen 7 días desde que reciben a notificación para que a limpen, en caso de que non a limpen o Concello imporalle unha multa. Aínda así, se quere podemos pasarlle unha relación dos expedientes que están abertos de todas as fincas, para que vexan que dende o departamento de Urbanismo, que son os que están levando este asunto, están requirindo aos propietarios desas e doutras fincas.

Intervén **Mª Pilar Candocia Pita** para dicir: O que pregaria é que a comunicación que se fai dende Urbanismo sexa continuada, é dicir, que non sexa só para que limpen agora senón para que o manteñan limpo. E no caso de que non estea limpo se proceda a limpalo e non se teña que chegar a ter herba de 30 centímetros.

Intervén a concelleira **Susana Mayo Redondo** para formular os seguintes rogos:

Terceiro rogo.- O meu rogo vai encamiñado a evitar que o Concello de Ames acabe sendo *trending topic* por cousas que non deben. Por favor, retiren o letreiro que hai en Tapia que pon "prohibirse tirarse" porque xa está dando suficiente cachondeo en facebook, twitter e demais. "Prohibido tirarse" ou "prohibese tirarse", pero "prohibirse tirarse", nun cartelón pegado a unha arbore, está traendo un nivel de broma que eu creo que hai que cortar.

Cuarto rogo.- O seguinte rogo ten que ver co Instituto do Milladoiro. Desafortunadamente houbo un accidente laboral dunha persoa da limpeza, é o segundo accidente que hai neste centro, non o estou destacando. A primeira vez a ambulancia si puido proceder a evacuar a rapaza, que naquel caso era unha alumna de actividades, e neste segundo caso non, por

algo que é moi fácil de solucionar. Daquela non cadraba que houbera ningún coche aparcado diante do acceso ao Instituto, pero esta segunda vez si que cadrou. Como non está prohibido aparcarse non se incumpria ningunha norma, e a ambulancia non puido saltarse a aceira e subir a rampla. A miña proposta é que se faga un rebaixe, xusto na zona que está na entrada, á porta do Instituto dende o aparcadoiro, que se pinte de amarelo e se retire o falso bolardo, porque xa se pode levantar pero os da ambulancia non o sabían, vírono alí e foron respectuosos. **Alfredo Taboada** di: Si que se pode mover. **Susana Mayo** di: Pois se se pode mover o mellor é retiralo, e poñer unha sinal vertical que diga que nesa zona pintada de amarelo non se pode aparcarse, porque é zona de evacuación. Unha solución fácil para algo que ata agora non se nos ocorreu, pero os accidentes tamén nos poñen de manifesto as cousas que podemos mellorar.

Quinto rogo.- Encadeando ao anterior de Pilar Candocia, neste caso non ten que ver con Ames senón con Santiago. Ás veces non se trata de que só os propietarios das fincas en Ames as limpen e corten senón que de vez en cando hai que darlle un toque ao Concello de Santiago. Como ben saben a subida ao polígono no Milladoiro está absolutamente invadida, xa non é o noso linde municipal, pero temos que cooperar necesariamente.

Intervén o **alcalde** para dicir: Respecto a este último rogo, dicirle que xa se lle ten requirido en diferentes ocasións ao Concello de Santiago, se quere facilítole as datas. E volveuse a solicitar recentemente co cambio de alcalde.

Intervén o concelleiro **Xosé Anxo Doval Rey** para formular os seguintes rogos:

Sexto rogo.- Acabamos de aprobar fai un momento dúas mocións, ás cales nós votamos favorablemente, co absoluto convencemento de que non van a ir a ningures como case ningunha das que se presentan neste concello. Por iso nós practicamente desistimos desa mala práctica, pasar o traballo para que ao final a moción diga *"instar ao alcalde para que faga as xestións oportunas"*, e logo nunca mais se saiba delas, para iso mellor non pasamos o traballo.

Este non é un rogo evidentemente, pero agora voulle dar forma para que sexa un rogo. O rogo vén a conto dunha moción que como a inmensa maioría das que se presentaron aquí nunca mais se soubo. É a respecto da modificación da lei que obrigaba as comisións de festas a realizar unha serie de trámites que lles ían derivar nunha serie de custos. Dende logo, o alcalde nunca nos dixo nada ao respecto das xestións que el levou a cabo, como xa daquela dixeran eu que ía acontecer. Polo tanto, o meu rogo vai no sentido de que, pasando de modificar ningunha lei, que xa sabemos ben que non o vai a facer vostede, que o concello asuma os custos derivados da aplicación da norma, chámense proxectos de seguridade, chámense outros aspectos, e que se estableza un procedemento polo cal as comisións de festas veñan aquí e só teñan que informar de *"vaise facer tal festa tal día"*, e o concello, cos seus medios, asuma todo o relativo á celebración desa festa popular, normalmente tradicional. Creo que o meu rogo está claro e espero que algún día me conteste, aínda que se non tampouco sería ningunha novidade.

Sétimo rogo.- Teño que recoñecer que a miña crenza no actual sistema democrático español está ao borde de ser nula. O que non pode ser é que neste concello se tomen acordos e non se cumpran e non haxa ningún tipo de responsabilidade por parte de quen os incumpre. Vou dicir un par deles: na comisión referida ás escolas deportivas, celebrada o 24 xullo de 2014 se aproba por ampla maioría e ao respecto das conclusións: *"que as conclusións desta comisión sexan comunicadas e informadas á corporación na primeira sesión ordinaria"*. A primeira sesión ordinaria é a de 31 de xullo, e o alcalde non da conta e non lle pasa nada ao alcalde porque non cumpre un acordo dunha comisión. Eu podería ler as conclusións pero non me dá a gana porque é a súa función e así o acordou a comisión.

Por non falar xa non do incumprimento senón de como o goberno fai o que lle dá a gana, a

pesar do que decida este pleno. Ao goberno dálle a gana de dar unha licitación a unha empresa privada en contra da decisión deste pleno e non pasa nada. Por moitas mocións que aprobemos, se do que se trata é de instar a outra administración, dado que nós como membros desta corporación non podemos propoñer absolutamente nada mais que relixiosamente rogarlle que por favor, pois evidentemente a crenza neste sistema pola miña parte ronda ao cero. Esperemos que estes movementos que se están a producir de romper con este sistema triunfen. O rogo é que por favor cambie de actitude e cumpra cos acordos plenarios e dos diferentes órganos desta corporación.

Oitavo rogo.- Referido a unha comunicación de correos que chegou á miña casa fai uns días. Ante a miña sorpresa resulta que me comunicaban que tiña un recibo con recargo polo imposto de circulación de vehículos. Digo a miña sorpresa, pero mais ben da miña muller, porque non era para min o recibo. En ningún momento eu recibira ningunha comunicación ao respecto de que tiña que facer ese trámite. Pode ser, aínda que eu suelo mirar o taboleiro do concello, pero tampouco vin que se anunciara. O rogo é que faga as xestións oportunas, xa que é competencia deste concello, para anular todos eses recargos, e no caso dos que xa pagaran que se devolva.

Noveno rogo.- Isto non é un rogo pero como non hai outra maneira de participar no pleno doulle esa forma. Produciuse a liquidación do orzamento 2013, comunicada ao Ministerio a 31 de xuño. Hai moitas paxinas web que recollen información a partir da paxina do Ministerio de Facenda, unha delas é a do Instituto Galego de Estadística. Se consultamos esa paxina nos di que a débeda viva deste concello no ano 2010 era de 5.226.000 euros e no ano 2013 de 6.659.000 euros. Non estou manipulando, estou lendo os datos. Iso quere dicir que no ano 2010 cada amiense debía 183 euros e no 2013, debe 223 euros. Xa digo, iso é a información oficial.

Intervén o **alcalde** para dicir: No tema do imposto de vehículos, estamos facendo xestións e cando teñamos algunha resposta que sexa beneficiosa para aqueles veciños que se lles remitiu ese recibo con recargo pois daremos publicidade, para que a xente que pagou o recargo, poida recuperalo. Non foi só neste concello senón que foi en mais concellos, polo que temos entendido, pero a nós o que nos importa son os veciños do noso concello e esperemos que se nos dea unha explicación ou unha solución a este problema.

Intervén a concelleira **Carmen Fraga Crespo** para formular os seguintes rogos:

Décimo rogo.- O meu rogo é para a concelleira de Medio Ambiente. Xa que estamos na época estival, que se dea unha volta por todo o concello aos colectores e ás proximidades deles, xa que hai escombros, colchóns, etc. **María Eugenia Martín Vicente** contesta: Ultimamente non está funcionando muy bien la brigada, porque estaban varios de baja, contábamos que se incorporaran esta semana pero finalmente no pudo ser, pero ya estamos en ello.

Intervén o concelleiro **José Blas García Piñeiro** para formular os seguintes rogos:

Décimo primeiro rogo.- Os meus rogos son para o concelleiro de Obras. A un vou a dar lectura porque é un escrito que nos fixeron chegar por correo electrónico e di: *"Veño a denunciar o maltrato que temos os veciños de Avenida da Maía Nº 119 e 121 pola falta dunha beirarrúa. Como pode verse na imaxe que adxunto de Google Maps hai unha parte para chegar aos nosos edificios que é bastante perigosa xa que os coches aparkan nese sitio sen deixar moito espazo aos peóns que temos que ter coidado. Cando chove, xunto cos coches aparcados temos o perigo das pequenas pozas de auga que fan que teñamos que pisar directamente parte da carreteira. E isto sen falar do perigo para os nenos pequenos e para nais cos seus carriños. Necesítase unha solución como poñer unha beirarrúa para poder pasar sen o perigo. De momento, que eu saiba, non pasou nada pero é un perigo constante cos coches pasando a toda velocidade ao carón nosa. Moitas grazas e un saúdo"*.

Continua **José Blas García Piñeiro**, dicindo: Iso é na entrada de Bertamiráns, vindo de Santiago ao marxe dereito, que hai un anaco que non ten beirarrúa.

Décimo segundo rogo.- Outro é da rúa Fragua en Bertamiráns. Os veciños estes días

presentaron un escrito no concello, queixándose por unhas tullas que hai na marxe dereita, que sobrepasan bastante o limite de peche da finca e están sobre a estrada, incluso algunha delas tapando as sinais de trafico, polo que rogo procedan á súa limpeza.

Décimo terceiro rogo.- A Pista en Mourigade que sobe, que vai a dar á estrada que vén de Guimaráns que vai polo Outeiro, está en bastante mal estado, con moitas fochas. É unha pista que usan os veciños para saír á zona de Bugallido e de Guimaráns.

Décimo cuarto rogo.- Este rogo non sei se vai para á concelleira de Medio Ambiente ou para o concelleiro de Obras ou para os dous en conxunto. Na Ameixenda, lugar de Mercuto, a rede de sumidoiros que se fixo fai uns anos, que vai subindo polo lado dereito á aldea, vai directamente ao monte, a uns eucaliptos que hai pola parte de atrás e din que está en bastante mal estado, con bichos e todo húmido. Despois, pola marxe esquerda sobe a nova rede de sumidoiros. O problema é que non están conectados un con outro. O que hai que facer é cruzar a pista e enlazar un con outro, son 4 metros mais ou menos.

Intervén o concelleiro **José M. Miñones Conde** para formular os seguintes rogos:

Décimo quinto rogo.- Solicito que modifiquen os nomes dos buzóns que instaloron na entrada do Concello, seguen aparecendo nomes de concelleiros que xa non están na Corporación.

Décimo sexto rogo.- Este é un rogo que xa fixemos varias veces e volvemos a retomalo. Que se suban á paxina web as actas dos plenos, as ultimas que están colgadas son do ano 2011, faltan 3 anos por colgar.

Décimo sétimo rogo.- Unha pista que está en Outeiro, de 50 metros, que da acceso a varias vivendas, está en bastante mal estado, hai que darlle solución. Aparte alí vive un veciño que ten problemas de mobilidade, do que xa vostedes teñen noticias, xa que a nai presentou escritos no concello.

Intervén o **alcalde** para dicir: Respecto aos buzóns do concello, eu non teño as chaves, a persoa que ten as chaves do seu grupo ten que cambialos por dentro, ao que **José M. Miñones** di: Entón cambiámolo nós.

Intervén o concelleiro **Emilio Martínez Carballeira** para formular os seguintes rogos:

Décimo oitavo rogo.- Empezarei rogando unha vez mais e creo que xa é a terceira ou cuarta vez, pola sinal da entrada da estrada que vai a Loureiros e termina en Augapesada. Segue tirada, creo que é o cuarto pleno que o digo. O encargado do persoal da nave pasa por alí todos os días e pode dicir onde esta. ¡É a cuarta vez en catro plenos diferentes!

Décimo noveno rogo.- Sigo dicindo unha vez mais que a desembocadura do río Ameneiral está completamente tapada, ¡se non se fai agora, vamos a ver cando se vai facer!.

Vixésimo rogo.- Señor alcalde, estamos empezando o mes de agosto e esa área que tanto se lle prometeu aos vellos, aos maiores do noso concello para dotalos dunha área cos seus complementos, para que poidan exercitarse e todo o demais. Eu xa sabía que se vai terminar a lexislatura e iso non se vai a levar a cabo, non me cabía a menor dubida, que lle vamos a facer, que teñan un pouco mais de paciencia os nosos maiores e a ver se para as próximas eleccións cambia isto. Que non caiba a menor dubida que se de nós depende será o primeiro que se faga.

Vixésimo primeiro rogo.- O cacho do río que temos aquí xunto ás oficinas da Deputación, pasamos por aí todos os días, uns e outros, eu non sei como tanto Remigio como os propios funcionarios da Deputación non presentan unha denuncia ao concello polos cheiros que están percibindo continuamente. A parte diso, está completamente cheo de brizos, de

balóns, hai táboas tiradas no río e ¡pasamos por aí todos os días e como se non pasamos, da igual!.

Vixésimo segundo rogo.- Temos estradas polas que pasamos tamén todos os días, nas que a maleza invade a calzada de tal xeito, que xa non poden pasar as persoas como é o caso da estrada que vai cara a Ramallosa. Ao pasar a ponte e a ambos lados, as silvas invaden por completo a estrada, e unha persoa non pode pasar por alí sen meterse ao medio da estrada.

Vixésimo terceiro rogo.- Que se limpe o entorno do lavadoiro e do muíño de Castrigo, así como a entrada da fonte que ten unha maleza dun metro de alto que imposibilita o acceso a ela.

Vixésimo cuarto rogo.- Procurar que os colectores se limpen e se laven de vez en cando, sobre todo os que están cerca das grandes áreas comerciais.

Vixésimo quinto rogo.- O paseo fluvial segue en estado de abandono.

Vixésimo sexto rogo.- Varios veciños me preguntaron por este tema: parece ser que o campo da festa da Peregrina segue estando no inventario do concello e todos sabemos que o campo da festa da Peregrina non é do concello. Xa levamos uns anos como para non darlle unha solución a este tema. Os veciños de Bertamiráns saben perfectamente que ese campo nunca foi do Concello e incluso ten xente no seu equipo de goberno que son de Bertamiráns e que saben iso perfectamente. Ao que **Carmen Verde Leboráns** di: É verdade.

Vixésimo sétimo rogo.- O 22 de xaneiro do 2014 entregou un escrito no rexistro do concello un veciño onde di o seguinte: *"Sendo propietario da casa Loureiros nº 5 o meu veciño polo norte posúe a parcela sen desbrozar, aínda que nos separa un camiño duns 2 metros. Solicito que notifiquen ó meu veciño para que limpe a parcela por salubridade"*.

Vixésimo oitavo rogo.- Vou ler un escrito dun veciño da zona de Lapido que presenta por rexistro o día 4 de xuño onde expón:

"1.- Agosto de 2011.- Escrito al Concello denunciando el incumplimiento de las normas sobre prevención de incendios por parte de algunos propietarios de parcelas próximas a mi vivienda

2.- Noviembre de 2012.- Escrito al Concello dando cuenta de que todos los denunciados cumplieron con su obligación a excepción del propietario catastral de la parcela X y solicito se le vuelva a comunicar al propietario referido la obligación de efectuar la limpieza y tala obligatoria y, en caso de incumplimiento, se actúe, a su cargo, por las brigadas municipales.

3.- Al no recibir escrito alguno del Concello, empiezo con mi visita, casi quincenal, al Departamento de Urbanismo (a donde me dirigen desde información municipal).

Al principio me dicen que no encuentran nada del asunto, ni informe del vigilante municipal de obras; luego, días más tarde, aparece el informe fotográfico y me comunican que se lo entregan a la abogada (5 agosto 2013).

Días más tarde me informan de que está a la firma del alcalde (29 agosto 2013) el edicto correspondiente y que, si no aparece el propietario, lo publicarían en el Boletín Oficial de la Provincia.

Ante esta información les dije, en Urbanismo, que varios vecinos me habían dicho que la propietaria era una señora que se llama X, que vive en Lapido, y que uno de sus hijos es el que, al parecer el que se "ocupa" de la parcela en cuestión. Después de esta conversación, por diversos motivos, dejé de acudir a Urbanismo esperando alguna comunicación al respecto, y sigo esperando. Se adjunta fotocopia de cartografía catastral".

Este mesmo veciño entrega outro escrito presentado por rexistro de data 4 de xullo de 2014 onde expón: *"que desde hace tres años (2011) estoy tratando de conseguir que ese Concello ordene al propietario catastral de la parcela X que cumpla las normas de prevención de incendios (en folio adjunto expongo con detalle las gestiones realizadas y la vía mas adecuada para localizar al referido propietario). En atención a todo lo expuesto*

solicito: ordene lo oportuno para que si fuese preciso se verifique una vez más el peligroso estado de la parcela en cuestión y se ordene al propietario realizar la limpieza correspondiente y en caso de incumplimiento se actúe a su cargo por las tarifas municipales, no quiero pasar otro susto y acudo con toda mi familia como en agosto del 2006”.

Este señor, fai uns anos tivo o lume practicamente na súa casa e nunca o Concello se preocupou de facer que o propietario desa finca a desbrozara ou que a brigada do concello a desbrozase, e despois pasarlle a factura correspondente. Como di él “*teño sorte que de momento alí non houbo lume, pero como prenda o lume alí vai casa e todo*”.

Intervén o **alcalde** para dicir: Preguntaremos por ese expediente e solicito que nos facilite o nome despois da sesión plenaria. Me di Luis Sampedro, pois xa miramos por ese nome.

Intervén o concelleiro **Ramón García Argibay** para formular os seguintes rogos:

Vixésimo noveno rogo.- O meu rogo vai encamiñado a un pedido que fixen noutros plenos; no caso do Milladoiro, a reclamación desa zona de seguridade, zona elevada ou un semáforo na zona onde está o Supercor, porque parece ser que volveu a haber outro susto fai pouco tempo. Contesta **Alfredo Taboada**: Estamos con el.

Preguntas.-

Intervén a concelleira **Mª Pilar Candocia Pita** para formular as seguintes preguntas:

Primeira pregunta.- O domingo pasado, sobre as 6 ou 7 da tarde, houbo un pequeno accidente na praia de Tapia, que por certo, o servizo de socorrismo atendeu moi rápido e moi ben. Na zona de baño, que está acotada pola presa, que este ano leva bastante auga, hai unha zona que ten muro pero hai outra zona que ten como unha especie de travesas, entón quedou alí unha rapaza coa perna entalada. A verdade é que o socorrista foi moi rápido, nin sequera os que estabamos alí bañándonos case non nos deu tempo de vela, xa que ela estaba facendo sinais coa man. Pero o que queremos preguntar é: ¿teñen coñecemento de se hai algún problema alí? En caso de que o haxa que se resolva. Dende logo, pola actuación dos socorristas estaban moi pendentes, algo xa debeu acontecer noutro momento, porque eles son conscientes de que alí hai un perigo. Neste caso foi unha chica, unha persoa adulta, pero alí báñanse nenos. A pregunta é: ¿teñen constancia de que hai algún problema? Se non teñen coñecemento, pregúntenlle aos socorristas que están alí e resólvano e dígnanos que é o que acontece alí, a miña impresión como bañista, é que como nese lado hai unhas travesas de madeira, noutros momentos que vai mais baixo o río non pasa nada, pero este ano como vai alto a presión da auga fai que alguén que teña pouca forza ou un neno sexa fácil que se cole entre os dous paus que hai e quede cun brazo ou cunha perna enganchada. Neste caso foi unha cousa pequena, tamén porque se actuou moi rápido.

Segunda pregunta.- ¿Que aconteceu na piscina do Milladoiro? A día de hoxe xa deben de saber se fallou algunha medida de seguridade. Non tanto de como se actuou senón que motivou o accidente, xa que non temos ningunha queixa da actuación.

Terceira pregunta.- En Bertamiráns, hai unha enfermeira que leva o cupo que lle corresponde do médico ao que está asociada e nese mesmo horario tamén cobre o cupo dunha persoa que está de baixa e leva de baixa moito tempo e non se cubriu, e tamén leva o cupo doutro médico que está de vacacións. Está levando 3 cupos, o que significa que non hai unha boa atención aos pacientes, non só porque se acumule a cola que case é o problema menor, senón porque ás veces teñen que tratar feridas e problemas que seguen nas casas dos pacientes, pero como ela non leva eses pacientes non sabe como estan, polo que non hai unha atención correcta. A pregunta é ¿teñen coñecemento desta situación? Se a teñen, ¿que fixeron ao respecto diante da Consellería de Sanidade para

pedir que subsanen iso? E se non o fixeron, ¿pensan facer algo?.

Cuarta pregunta.- Ao respecto do centro de saúde do Milladoiro hai un problema co servizo de pediatría de tarde, non sei se teñen coñecemento que neste momento falta un pediatra e queremos saber se fixeron algo a este respecto e que contestou a Consellería.

Quinta pregunta.- En relación ás escolas unitarias de Agrón e Bugallido, que desgraciadamente perdemos. Hai un ano, aprobamos aquí unha moción por unanimidade, gracias a que a sociedade civil, gracias a que a poboación, gracias a que a veciñanza, a cidadanía, saíu na súa defensa con uñas e dentes, agora tocáballe ao concello defendelas. Tocáballe ao concello facer campañas para poñelas en valor, tocáballe ao concello poñer servizos complementarios para que a xente optara por eses centros. Hoxe, nos quedamos todos atónitos, vendo como unha veciña denunciaba que cando ela foi ao concello para preguntar, nas oficinas do concello se lle contestara que *“as escolas unitarias eran cousas doutro tempo e que agora tocaba outra cousa”*. Tamén quero chamar a atención sobre que un deses centros, concretamente o de Bugallido, está adscrito a un centro que é o Agro do Muíño, que está absolutamente masificado. Na mesma zona e dependendo do mesmo colexio Agro do Muíño está a escola unitaria de Ortoño, na que a profesora está desbordada e aos pais do rural, que normalmente levan aos nenos en coche, lles daría practicamente igual levalos a Ortoño que a Guimaráns, non habería diferenza. Eu pregunto ao concelleiro de Educación se fixo algunha campaña, se falou coas familias, se intentou desviar os nenos de Ortoño para Guimaráns para conseguir que non se pechara Guimaráns. Pregunto se houbo algunha outra cousa que se fixo e tamén que se dea conta de porqué se está dicindo esa cousa dende os servizos municipais, ao respecto das escolas unitarias. Quero que me conteste o goberno se cree ou non na moción que se aprobou por unanimidade aquí, na que se defendían as escolas unitarias como un valor. Non esquezamos que esas escolas se montaron cos cartos da cidadanía, cos cartos dos emigrantes que se están perdendo, que son necesarias e que estamos deficitarios de prazas. O que fai falta é ter ideas señor concelleiro, ter ideas señor alcalde. Ter ideas para utilizar aquelas infraestruturas que temos e intentar dar un mellor servizo, porque se temos problemas de prazas non ten sentido eliminar prazas e moito menos cando hai unha sensibilidade enorme na xente do noso Concello a respecto dese tipo de docencia que se imparte nas unitarias que é moi distinta, moi familiar, moi diferente e ten moito mais que ver co que se está facendo en moitos países europeos cos cativos ata os 8 e 10 anos que o que se fai aquí na escola de primaria. Nos deron unha lección os veciños, non só de dignidade, que era algo que pertencía ao pobo, senón tamén por defender un modelo pedagóxico que sabían do que estaban falando, moitos pais e nais nos viñeron a dicir que a eles lles viñan peor a nivel persoal pero que optaban por iso, porque sabían que era beneficioso para os seus fillos/as, e resulta que dende o concello se esta dicindo que é algo anticuado. Eu creo que vostedes non saben moi ben o valor dese tipo de institucións, non son conscientes. A pregunta é se se fixo algún tipo de promoción, sensibilización ou algún tipo de apoio extra para que a xente optase por esas escolas. Pregúntenlle á profesora da escola da Tarroeira se necesita ter menos nenos ou non, porque a verdade é que hai que facerlle un monumento a Carmen.

Sexta pregunta.- Vai dirixida ao alcalde. Como son bastante observadora, estiven pendente de ver que facía cando nos pasaron esa comunicación aos concelleiros/as de que facían unha engádegas á moción. Vostede, con total naturalidade, a pasou ao grupo socialista, a nós, a Pacto X Ames. Ao que o **alcalde** di: Paso unha copia a cada un, é dicir, catro. Continua **Mª Pilar Candocia Pita** para dicir: É un acordo tácito que todos admitimos e que todos sabemos. Hai un acordo tácito que nós aceptamos para ás comisións e para o cobro das mesmas, recoñecendo que non somos grupos municipais pero si agrupamentos políticos. Eu creo e pregunto se os concelleiros/as desta corporación temos dereito a que todos/as veciños/as podan meter nos rexistros municipais aquelas cuestións que consideren para que se metan no noso buzón ou enviarnos unha carta. A min as veces me chega ao meu nome unha revista que me ven polo correo, polo que interpreto que temos dereito. Pregunto, todos os/as concelleiros /as indistintamente de que teñamos grupo municipal ou non, sexamos ou non non adscritos, temos dereito a ter comunicacións ¿non señor alcalde?.

Ao que o **alcalde** di: Continúe, se é polas copias, aquí hai mais copias por se as queren. Contesta **Mª Pilar Candocia Pita**, dicindo: Non é por iso, é só un exemplo de que cando lle interesa, tacitamente somos grupo político e cando non lle interesa non saben quen son Ames Novo, e a uns veciños que queren meter unha cousa no rexistro do Milladoiro se lles di "que iso non existe". A funcionaria lle di: "iso non existe", e di que aquí so hai non adscritos e que non pode meter ese escrito por rexistro. Eu sempre alucino que nun rexistro municipal se mire a ver que se leva e que non se leva, porque con tal de non se falte ao respecto, nun rexistro municipal pódese meter todo. Logo alegase que temos un buzón, se temos un buzón presuponse que alguén do Milladoiro non terá que vir a Bertamiráns, haberá un correo interno, poderán deixalo na oficina de Milladoiro e da oficina de Milladoiro traerano para aquí e nolo meteran no noso buzón. Pero desde logo a contestación foi mais unha contestación dun grupo político que dunha funcionaria. Porque un funcionario e me consta que a maioría así o fai, en todo caso lle diría, "se vostede quere meter algo, mire, así non lle pode entrar porque non son grupo municipal pero se o mete a nome dun deles si que lle entra, sen ningún problema" iso sería o que tiña que facer.

O persoal de aquí, e así me consta, son coñecedores de cal é a situación política do Concello, e ademais non somos tantos concelleiros como para non coñecer os nosos nomes e non saber de que pe coxemos cada un e de que lado estamos. Por tanto, eu pregunto, ¿por que se está dicindo dende unha oficina municipal que non se pode recoller algo nun rexistro porque somos non adscritos e non somos grupo municipal?. En todo caso, lle terán que dicir que non pode ser nomenclatura de grupo municipal, se queren, se queren, porque iso xa é unha cuestión de vontade. Pero, en todo caso, si que lle teñen que dicir que si o poñen a nome da persoas si que o poden que facer. Como dixo Anxo, eu xa estou moi incrédula porque xa están rotas todas as normas do xogo, eu non sei con que cartas estamos xogando, ¡non poña esa cara! , é que é moi grave.

Intervén o **alcalde**, para dicir: Vostede está insinuando que eu estou instigando a alguén para que faga iso, da a impresión dona Pilar. Ao que **Mª Pilar Candocia Pita** di: Eu non lle estou dicindo iso, o que lle digo é que unha persoa fixo iso.

Ao que o **alcalde** comenta: O que vostede está dicindo implicitamente é que dende aquí se están mandando consignas para facer ese determinado feito.

Intervén **Mª Pilar Candocia Pita** para dicir: O que lle pido é que investigue o que aconteceu. O de que unha funcionaria municipal diga ex BNG coincide coa nota de prensa do partido popular. Volvo a dicir que nos importa un comino, pero ademais a min o que me chama a atención é outra cousa, cando aquí mandan algo para o BNG, non para Ames Novo, senón para o BNG, nolo traen ao noso buzón, e nós non temos ningún problema en pasarllo, chamámoslos e llo pasamos.

Intervén o **alcalde** para dicir: Normalmente, o que lle podo dicir e así o ten manifestado o anterior responsable local do BNG, e o actual responsable local do BNG, é que todas as contestacións se fagan por correo electrónico, ata onde eu sei é así.

Ao que **Mª Pilar Candocia Pita**, di: Se un veciño trae un escrito.

Intervén o **alcalde** para dicir: Vostede está falando do BNG, do grupo que segue existindo, o normal é botalo no buzón de correos.

Intervén **Mª Pilar Candocia Pita** para dicir: A xente non o bota. Eu digo que hai comunicacións que veñen para o BNG que se nos meten no noso buzón do concello.

O **alcalde** pregunta: ¿Pero non é o Concello o que manda as comunicacións?.

Intervén **Mª Pilar Candocia Pita**, para dicir: Se chega algo de Ames Novo, non saben onde metelo, iso é o que nos chama a atención. O que lle dicimos é que aconteceu iso, e a

pregunta é ¿sabe que aconteceu iso? E senón o sabe, a pregunta é se ten pensado comunicar que de aquí en diante todos os concelleiros temos dereito a recibir todo o que nos queiran meter os veciños/as, ANPAS, asociacións ou o que sexa nas nosas caixas de correos e quen o queira facer en Milladoiro poida facelo, ben a través do rexistro ou ben a través do buzón. A miña pregunta era se sabía que acontecera iso, e se non sabe que aconteceu iso que faga as xestións precisas para que non volva a acontecer .

Intervén o **alcalde** para dicir: Estráñame que un traballador municipal non queira aceptar un escrito que vai dirixido a un concelleiro.

Intervén **Mª Pilar Candocia Pita**, que di: Non, ía dirixido a un grupo, entón tería que dicirlle, diríxeo a un concelleiro porque senón coma grupo non o podo rexistrar, que tampouco sei porqué non o pode rexistrar, porque ás veces a xente se equivoca e pon conselleiro en vez de concelleiro e se lle collen igual os escritos, eu creo que xa depende da vontade.

Intervén o **alcalde**, que di: Iso é polo seseo.

Intervén **Mª Pilar Candocia Pita**, para dicir: Pode ser, agora somos todos das rías baixas, que pasa, ¿vostede veranea en Sanxenxo?.

Contesta o **alcalde**, que di: Non me verá vostede por alí, seguramente vai vostede mais ca min a Sanxenxo.

Continua **Mª Pilar Candocia Pita**, que di: ¡Non home, non!, que eu son do norte. Pois nada, que faga a xestión que considere precisa e agardamos que nos dea conta.

Intervén **Mª Eugenia Martín Vicente** para dicir: El incidente de Tapia ya se está solucionando, se va a arreglar. Es debido a las crecidas de agua como consecuencia de la lluvia que ha habido este invierno, que se ha deteriorado, pero se va a cambiar, lo que pasa es que hay que esperar a que baje un poco más el nivel del agua porque con la presión no se puede hacer. Espero, que si sigue este tiempo, la semana que viene ya puedan arreglarlo.

Intervén **Mª Pilar Candocia Pita**, para dicir: Entón non sería malo que se poña algún aviso de que hai ese problema. Insisto en que os socorristas estiveron moi atentos e tiñan constancia de que alí pasaba algo, pero de todos modos, que a xente o saiba e poñer algún tipo de sinalización mentres no se arranxe.

Intervén **Mª Eugenia Martín Vicente** para dicir: En cuanto al accidente del Milladoiro están haciendo todos los informes pertinentes para saber con exactitud que es lo que pasó. La piscina tiene todas las revisiones y todas las autorizaciones, pero se están haciendo informes. En cuanto a lo que está pasando en el ambulatorio, tanto de Bertamiráns como de Milladoiro, se le consultará al SERGAS y se estudiará con ellos a ver que soluciones han adoptado y si nos parece pertinente o no la solución.

Intervén **Mª Pilar Candocia Pita** para dicir: Cando fagan a consulta, nos pasan a contestación, por favor.

Intervén a concelleira **Susana Mayo Redondo** para formular as seguintes preguntas:

Sétima pregunta.- Eu creo que con respecto á Xerencia de Atención Primaria xa non se trata de falar con eles e xestionar con eles, senón que temos que xestionar contra eles dunha vez. A miña pregunta ten que ver de novo coa matrona do Milladoiro e quero que me aclare o señor alcalde, se houbo e se existen e cantas chamadas ou reunións houbo co alcalde de Brión e coa Xerencia de Atención Primaria, por separado ou xunto. ¿Que resultado produciron estas xestións? Sei polos medios de comunicación o que fixo o alcalde de Brión, pero non sei nada do meu alcalde, entón a pregunta é ¿cantas conversas tivo sobre a matrona do Milladoiro e que resultado produciron?.

Oitava pregunta.- ¿Vanse comezar as obras do aparcadoiro de Ventín? ¿Temos data?.

Contesta **Alfredo Taboada**: Non. Ao que **Susana Mayo** di: ¿Non temos data?. Cada vez que pregunto vai peor a cousa. Continua **Alfredo Taboada**, que di: Non che podo dicir que teño data, podo dicir que veu aprobado e agora hai que facer os trámites, levará dous meses. Eu intento axilizar todo o que podo pero leva o seu tempo.

Novena pregunta.- ¿O acceso pola parte de atrás do Instituto do Milladoiro? Contesta **Alfredo Taboada:** Está no mesmo camiño. Ao que **Susana Mayo**, pregunta: ¿Vai ser no mesmo tempo, menos, peor? Contesta **Alfredo Taboada:** Algo mais de tempo.

Décima pregunta.- A última pregunta ten que ver con Merca, Tapea e Gaña, Milladoiro 2014. Colabora Concello de Ames, e a colaboración do Concello de Ames co Merca e Tapea, a colaboración visible, quero dicir, habería outras, é este bochornoso folleto que che deixa a tinta na man, que chorrea tinta por todas partes e que non se visualiza ben. Se en algo hai que meter cartos e interese é xusto nesta parte, na publicitaria, promocional. Nesta parte foi onde se lle pediu colaboración ao Concello de Ames e o que fixo foi isto. O **alcalde**, pregunta: ¿Quen edita iso? Continua **Susana Mayo:** Eu consultei con AEMI e preguntei ¿en que consistiu a colaboración do Concello de Ames?. Díxome que nun 1 euro por folleto para publicar este folleto, esta cousa. Eu digo o que me di AEMI.

Intervén o **alcalde** para dicir: ¿Pero o editou o Concello de Ames? Vostede está dicindo iso, falaba do material.

Intervén **Susana Mayo**, para dicir: Da pésima calidade da que me di AEMI que é a colaboración do Concello de Ames. Intervén o **alcalde:** Nós non editamos iso.

Continua **Susana Mayo:** Obviamente, se o Concello de Ames pon moitos cartos iso sairá mellor, se pon poucos cartos, sairá peor.

Intervén o **alcalde** para dicir: Ata onde sei eu nós non editamos iso, non encargamos a impresión.

Intervén **Susana Mayo** para dicir: O meu traballo aquí é consultar, e cando consultei con AEMI en que consistira a colaboración do Concello de Ames, o que me dixo AEMI foi, nós pedimos a publicación deste folleto, este folleto valía nas condicións que eles estimaban de calidade, é importante a calidade nun folleto de promoción económica, 4 euros, ese era o valor estimado e o que sucedeu é que o Concello de Ames colaborou cun 1 euro. Eu aquí transmito información, en todo caso esta é unha forma curiosa de botar a man, miña avoa dicía nestes casos: “botar a man ao pescozo mais que outra cousa”. Pero para min aínda houbo unha actuación peor e esa non ma contaron, xa que a vivín eu. En todo momento, a dirección de AEMI estivo en contacto co concelleiro de Promoción Económica para levar adiante esta campaña, iso cónstame. E desde o primeiro momento o concelleiro de Promoción Económica coñecía que o lugar no que querían para facer a festa final, a festa de entrega de premios cunha disco móbil era a explanada do aparcadoiro diante do Supercor. O concelleiro non só o sabía, senón que entendo que lle deu o beneplácito a esa ubicación, xa que permitiu que AEMI estivese unha semana con megafonía, con información nas tendas dicindo que a festa ía ser alí. Era unha festa axustada ao espazo, explícome, non eran grandes camiões da orquestra Panorama, non eran grandiosos inchables. Para que se fagan a idea eran as dúas haimas do concello, 2 ou 3 coches que se exhibían por parte dos promotores da festa e 2 inchables. E a 48 horas de que fora a festa o concelleiro comunícalles que alí non podía ser, senón que tiña que ser na Travesía do Porto, ¡no deserto! Así foi de penosa e de bochornosa a acción final do Merca e Tapea, supoño que non vai a estar en desacordo comigo que foi bastante lastimoso ver aquel escenario, e a miña pregunta é ¿por que non se lle concedeu onde eles tiñan inicialmente previsto, onde o Concello non lle puxo ningún problema ata 48 horas antes? ¿Por que? ¿Cales eran as condicións técnicas, loxísticas que non cumprían para mandalos á Travesía do Porto cando se trataba dunha actuación, dunha intervención pequena e modesta?.

Intervén **Bernardo Moar**, para dicir: A ver se son capaz de saber cales son as preguntas. Nós, en todo caso, seremos colaboradores, quen organiza o Merca e Tapea é a Asociación de Empresarios do Milladoiro, que contrata a unha empresa todo o traballo. A nós o que nos pediron foi subscribir un convenio, en todo caso, nós non lle dixemos que iamos a dar

nin 1 euro nin 4 porque non tiñamos datos para poder dicirille que iamos a dar 1 ou 4 euros nese momento, nin os temos a día de hoxe, os teremos, espero, para a semana que vén. Non encargamos a edición, xa que a encargaron a unha empresa privada de aquí, do Concello de Ames, que supostamente o fixo nunha imprenta, aínda que salta á vista que iso non esta feito nunha imprenta. Eu non sei se custou 1, 4 ou 6 euros, non teño nin a mais remota idea, foi unha cousa que encargou a asociación de empresarios.

En canto ao tema do aparcamento, fan unha solicitude, fixeron todo, a verdade é que foi un pouco todo a tropicóns, hai que dicilo así, todo un pouco a salto de mata, tendo que chamalos dende aquí requiríndolle documentación, a verdade é que foi unha festa un pouco improvisada. O que non poden facer é unha solicitude e estar anunciando algo sen ter a concesión do espazo. É así de simple.

Intervén **Susana Mayo**, para dicir: Señor concelleiro, non vou dicir que saín todas as noites desa semana porque traballo, pero aínda saín unha poucas porque me permitín por unha vez facer o Merca e Tapea, e sempre o atopei a vostede coa directiva de AEMI, ben o sabe, ou sexa que non me pode dicir que non estaba ao tanto do que estaba pasando co Merca e Tapea, non foi unha sorpresa de última hora. É mais, vostede, salvo que me mintan, chega a dicirilles a 48 horas, insisto niso, porque eu 3 días antes estaba citada nun sitio e 2 días despois era “non, non, que temos que cambialo” e vostede chegou a dicirilles “é que o alcalde non me firma”, entón eu quero un argumento un pouco mais sólido que “o alcalde non me firma”.

Intervén o **alcalde** para dicir: A min non me puxeron nada á firma.

Intervén **Bernardo Moar** para dicir: As solicitudes están por rexistro, así que pode buscalas. Consulte.

Intervén **Susana Mayo** para dicir: Pero entón ¿por que non llo aceptaron? Di que non entende a pregunta, pero a pregunta é ¿por que non lle aceptaron esa proposta?.

Intervén o **alcalde** para dicir: Relacionaremos toda a documentación e lle daremos unha explicación.

Intervén **Susana Mayo** para dicir: Eu agradeceríalle agora que vostedes teñen este celo en cumprir a lei con respecto ás instalacións ao aire público, que me manden o informe do que non cumpría AEMI nun caso e se cumpría noutro.

Intervén o **alcalde** para dicir: Vostede empezou dicindo que ese folleto o fixera o Concello, criticando a súa calidade, é a impresión que me deu.

Intervén **Susana Mayo** para dicir: Agora que estamos tan rigorosos coas comisións de festas e coas actividades ao aire libre quero pensar que cando se denega ese aparcadoiro a AEMI é cun informe tamén rigoroso que di: non cumpre tal norma. Traballen iso un pouquiño, igual que fan traballar aos cidadáns, traballen un pouquiño, porque a AEMI metéronlle présas e dalgúns tramites lles informaron 24 horas antes.

Intervén o concelleiro **Xosé Anxo Doval Rey** para formular as seguintes preguntas:

Décimo primeira pregunta.- Vai sobre as escolas unitarias, colaboración, petición, denuncia dunha veciña de Bugallido: *“Moitas xeracións saímos da unitaria de Bugallido, eu quixen meter á miña pequena e xa non puider, e se chamas ao concello para asesorarte, o primeiro que fan ou intentan é quitarche da cabeza a opción de outra unitaria aínda que estea a 2 km. da casa do neno/a fronte aos case 16 ou 17 km. do colexio que che recomendan con unha insistencia case molesta”*. Palabras textuais *“as unitarias tiveron o seu tempo pero xa pasou”*, isto dino dende o Concello.

A pregunta é ¿o concelleiro, que é o responsable, sabe que se están dando estas respostas á xente que pregunta? Esa é a política que dende a Concellería se fai, sacarlle da cabeza á xente a posibilidade de que un neno vaia á unha unitaria. Preguntar tamén se dende a Concellería de Educación ou dende o goberno, teñen a visión de que *“as unitarias xa tiveron o seu tempo e este xa pasou”*, e por tanto, débese dar esa visión ao cidadán.

Décimo segunda pregunta.- Outra pregunta é referida ao Plan de drogodependencia. Nós

preguntamos no mes de xuño sobre as accións que se realizaron no curso 2013- 2014 sobre prevención de drogodependencia. Se nos contesta e se nos di que se fixeron unhas actuacións que afectaron a un total de 250 nenos, dos cales do Colexio Alca foron 52 alumnos, do CEIP A Maía foron 130 alumnos, do CEIP de Barouta 17 alumnos e do IES Milladoiro 51 alumnos. A pregunta é ¿que pasa co resto de centros educativos do Concello, por que non se realizou ningún tipo de actividade?.

No ultimo informe que temos por parte do goberno, do ano 2011, onde existía un servizo de drogodependencia municipal, as actuacións que se fixeron afectaron a mais de 1.800 alumnos fronte aos 250 actuais. Ademais se realizaron actividades cos pais que é unha cuestión fundamental, cousa que agora non se vai facer ningunha. Polo que se deduce que ao cambiar a forma de dar este servizo de publico a privado, é evidente que se deteriorou enormemente. A miña pregunta é: ¿Tense pensado retomar o servizo de prevención de drogodependencia, dende o Concello en solitario ou en colaboración con outros Concellos?.

Intervén o concelleiro **Emilio Martínez Carballeira** para formular as seguintes preguntas:

Décimo terceira pregunta.- A mesma do pleno anterior, que unha vez mais está sen contestar ¿por que se sacou a pérgola da praza de Chavián?.

Décimo cuarta pregunta.- ¿En que situación está a leira parquink? ¿Hai vías de solución? ¿Volveron a falar cos propietarios?. Levamos 3 anos sen ser capaces de darlle unha solución. Quedou de contestarme, levo varias veces esperando e aínda non me contestou.

Décimo quinta pregunta.- Aí atrás saíu na prensa que un dos equipos do Bertamiráns xunto co seu presidente fixo unha visita ao Concello, quixera saber: ¿esa visita que fixo ao concello este equipo foi porque os convocou vostede? ¿E con que obxecto?.

Décimo sexta pregunta.- Non estou moi ben informado pero creo que vostede me poderá informar tanto a min coma ao resto da corporación, en relación a unha palista que pertence ao clube Ribeiras do Tambre, que segundo o que eu teño entendido, parece ser que non puido participar por falta de medios económicos, nun campionato a nivel mundial. Quixera que me informase ao respecto deste tema.

Intervén o **alcalde** para dicir: No tema da Pérgola creo que xa lle contestáramos noutro pleno. Ao que **Emilio Carballeira** di: Quedaron de contestarme pero non o fixeron. Ao que **Alfredo Taboada** di: Está podre totalmente.

Intervén **Emilio Martínez** para dicir: Mira Alfredo, non cabe a menor dubida que non vos vou botar a culpa de todo nin moito menos, porque outros anteriores a nós e aos que están agora deixaron arruinar por completo todo o que outra corporación fixo, pero iso non quita que os que están agora fagan un mantemento como deus manda, para non deixar podrecer as cousas, porque iso non vale 4 pesetas, e o mais fácil é coller e cortar polo pé e listo. Detrás da pérgola de Chavián irá a que está enfronte ao bar de Noe, e despois irá a que está no Pazo da Peregrina, e así estamos.

Intervén o **alcalde** para dicir: Sobre a palista, o que eu sei é que foi unha decisión dela ou do clube que non participara, pero lle preguntaremos oficialmente para darlle unha contestación oficial respecto de porque non foi a un campionato e foi a outro.

Intervén **Emilio Martínez**, para dicir: Eu a respecto diso, co pouco que sei, se un deportista da especialidade que sexa vai a participar nun campionato do mundo, os custos do mesmo, teñen que ser costeados pola federación nacional, iso en primeiro lugar. En segundo lugar, a min me chegaron aos meus oídos que parece ser que esa palista percibiu algún apoio por parte do Concello, ese apoio parece ser que non foi suficiente. Eu o que si quixera saber é se foi por falta de medios. Basta que esa palista sexa do noso concello

para que o concello, neste caso nós, e neste caso vostede como persoa mais indicada, ten que facer as xestións oportunas, ben sexa coa Dirección Xeral de Deportes, ben sexa co concelleiro de turno, para dotar a esta rapaza dos medios suficientes para que poida participar. Eu non sei se iso é así ou non, porque non me contaron todo, e por iso llo pregunto.

Intervén o **alcalde** para dicir: Pois vamos a formularlle unha petición oficial ao clube para que o explique e non haxa dúbidas do apoio que lle deu o Concello. Pedímoslle unha comunicación oficial e así saímos de dúbidas.

Intervén o concelleiro **Ramón García Argibay** para formular as seguintes preguntas:

Décimo sétima pregunta.- Como dicía antes o compañeiro dos non adscritos Anxo, a verdade é que a nosa labor moitas veces non ten moito xeito, nin maneira, no sentido de obxectivos a cumprir e das razóns. A pregunta é: ¿vostede contestou á veciña de Casanova ao escrito que presentou no seu momento? E se lle contestou ¿cando? E se non o contestou ¿vai contestar?.

Décimo oitava pregunta.- Relacionada coa obra que se está facendo na parada de taxis de Bertamiráns. despois de que remate a obra, a parada de taxis ¿vai quedar no mesmo sitio ou teñen outra ubicación prevista? ¿Que vai pasar con ese proxecto?.

Décimo novena pregunta.- Relacionada coa licitación da auga que saíu publicada no Boletín Oficial da Provincia o día 12, coas présas que estamos acostumados por parte deste goberno, publicaron dúas veces os pregos técnicos en vez de publicar o prego administrativo, non se pon o anexo número 4, etc etc... pero como ao final vemos que os valores, xa non vou a dicir democráticos ou non, os valores en xeral son o máximo expoñente deste goberno, e enténdase a metáfora, pois de momento vou a desistir de pedirlle explicacións aínda que non dubide vostede que llas pediremos.

Intervén o concelleiro **José M. Miñones Conde** para formular as seguintes preguntas:

Vixésima pregunta.- Teño bastantes preguntas, entón non sei se sería mellor se non quere responder ao momento pasar ás seguintes e me resposta ao final. Ao que o **alcalde** di: Vostede vaia formulando e o que poida contestar o contestamos. Continua **José M. Miñones**, que pregunta: ¿Por que non se deu conta do resultado da comisión das escolas deportivas?.

Vixésima primeira pregunta.- ¿En que situación está a solicitude da empresa que a través do Bertamiráns presentou en As Pateiras unha solicitude de construción de pistas de padel?. Sabemos que se fixo unha reunión coa Xunta de Galicia a primeiros de ano na que a Xunta daba a entender o visto bo, entón non sabemos, a día de hoxe, en que situación está. ¿Cal é a iniciativa que ten pensado facer o Concello se é que ten pensado algunha a estas alturas?.

Vixésima segunda pregunta.- Saber en que punto se atopa a instauración dos procedementos da administración electrónica, se xa están todos instalados, se xa se deu toda a información e a formación, etc. Sabemos que dentro do prego estaba tanto a información externa coma a interna e a formación do persoal, non sabemos se xa está funcionando todo o previsto no prego.

Vixésima terceira pregunta.- É sobre a liquidación. No apartado de Dar Conta, dixo que unha vez que está presentado o informe da liquidación, convocarase a comisión, ¿cantos días son para a comisión? Coñecer os días exactos, se falamos de 15, 20, entendendo que empezan a contar dende o día de hoxe que é cando se presenta o informe da liquidación.

Vixésima cuarta pregunta.- No referente á empresa GTT, mediante un decreto do mes pasado, está a traballar aquí, nas dependencias municipais, e traballa en horario de tarde. Gustaríame saber se teñen chave para abrir e pechar, quen é responsable de que eles estean traballando en dependencias municipais se acontece algo, e se se está a cumprir a lei de protección de datos en todo o referente á documentación municipal, estando unha empresa externa traballando no Concello e sen estar presentes nin o concelleiro nin un técnico do Concello.

Vixésima quinta pregunta.- É sobre o tema da Deputación, creo que xa van varias mostradas de que se equivocaron vostedes ao tomar esa decisión. En decembro de 2012, nós o criticamos abertamente e ademais dixemos que non ía ser mellor para o Concello trasladar todas esas taxas e impostos para que as xestionase a Deputación. Agora xa sabemos que a calidade do servizo minorou, son colas as que se fan nas dependencias que ten a Deputación, para poder facer calquera tramite ou xestión, as sufrimos nós mesmos cando fomos. Hai un traballo paralelo por medio da empresa GTT, polo tanto, un sobrecusto paralelo porque non se pode levar toda a xestión de tributos, e polo tanto, ten que seguir esta empresa. Ademais, esta empresa, ten un custo moi elevado, creo recordar arredor de 90.000 euros ao ano. Hai un intento fallido de licitación para que unha empresa levara estes expedientes, taxas e como non foi adiante agora vostedes teñen que voltar atrás novamente. Acábase de comentar que houbo un retraso no envío das cartas do imposto de vehículos, o cal o sufrimos tamén algúns de nós. É dicir, existen unha serie de feitos xa consumados, que demostran que levar todas esas xestións á Deputación é prexudicial, non só para o Concello, senón tamén para os veciños. Entón, a pregunta é, ¿pensan dar marcha atrás neste sentido e volver a xestionar de forma municipal eses tributos?.

Vixésima sexta pregunta.- Referente ao tema da licitación da auga, e só vou facer unha pregunta, ¿por que 9 meses? ¿É por algo en concreto? ¿É porque se se licita por mais de 9 meses xa tiñan que licitar mediante outro procedemento, tiña que ir ao pleno, non podía ir á Xunta de Goberno?. Porque facendo as contas dos 9 meses, situámonos precisamente no mes de maio-xuño do vindeiro ano, período de eleccións municipais. Cando se chegue ao mes de xuño vai ter que tomar a decisión de que facer con ese servizo o novo goberno que entre. ¿Por que 9 meses e non 10? ¿Por que non se contempla a prórroga?.

Vixésima sétima pregunta.- Referente á débeda, chámanos a atención do informe que se presenta coa liquidación 2013, que se faga unha comparación no apartado de gastos con respecto aos anos anteriores, sen embargo no apartado de débeda non aparece esa comparativa, entón ¿por que non se fixo esa comparativa de débeda con respecto aos anos anteriores?. Pero o mais salientable respecto da débeda e que nos gustaría saber é ¿por que nos cálculos da débeda non se inclúen as operacións de préstamos pendentes de concertar, como se facía nos gobernos socialistas?. Iso que facían vostedes, con tanto chamamento nos panfletos, dicindo que a débeda era de 20 millóns ou 15 millóns no Concello de Ames porque se incluían esas operacións de préstamos pendentes de concertar, por que agora non aparece no informe de liquidación? ¿por que non se inclúen nese calculo da débeda, as operacións de préstamo pendentes de concertar de anos pasados?.

Vixésima oitava pregunta.- ¿Segue funcionando e utilizándose o servizo de control de presenza e marcaxe do persoal?. Se segue funcionando, ¿teñen vostedes constancia de que algún non funciona a día de hoxe?.

Vixésima novena pregunta.- Sobre o do equipo de Bertamiráns, foron varios equipos de Bertamiráns os que gañaron diferentes competicións. O que nos estraña a nós é: ¿por que non se informou e invitou ao resto da Corporación a ese acto? Entendo que foi institucional e non do PP. Tamén chama a atención que non existe noticia na web, que para iso non se faga anuncio. Foron varios, o equipo cadete, o equipo infantil B e o equipo infantil A, e non sei se estaban os pequenos. O Bertamiráns se encargou de chamar aos rapaces para ver se podían asistir porque foi dun día para outro. ¿Por que non se invitou a toda a Corporación? A foto foi na entrada do Concello.

Trixésima pregunta.- A obra de beirarrúas do Colexio Alca, non sabemos que prazo ten previsto para iniciarse. Pero vostede sabe perfectamente que como non se inicie antes do

inicio do curso, vai a ser imposible ao longo do curso. Iso vai a supoñer un grave prexuízo para os usuarios, xa que é imposible levar unhas obras estando o curso en marcha. E simplemente dicir a modo de información, ao que dicía Emilio da pérgola, que no ano 2010 se fixo un arranxo e un mantemento da pérgola, non se deixou da man, e do ano 2010 ao ano 2014 non creo que se estropease tanto.

Intervén **Emilio Martínez** para dicir: Con respecto á pérgola, cando se arranxou esa pérgola tiña un tellado de madeira e púxoselle un de lona.

Intervén o **alcalde** para dicir: No tema das beirarrúas creo que se vai a sacar a licitación proximamente, e claro os prazos van a estar xustos para o comezo do curso.

Intervén **Mª Eugenia Martín Vicente** para dicir: Con respecto a las escuelas deportivas se va a traer con el dictamen del órgano de contratación, ya se han pedido todos los informes a los técnicos.

Intervén o **alcalde**, para dicir: No referente ao servizo de control de presenza non se me comunicou que non estivera a funcionar, eu vexo á xente e segue fichando. Sobre os procedementos electrónicos miraremos, porque me din que están instaurados todos, pero tampouco llo podo asegurar agora mesmo, pero me da a impresión de que si. Sobre o da Deputación, si que houbo ese problema que vostede di, pero ¿volver a dar marcha atrás? Non temos pensado dar marcha atrás. O do Bertamiráns e as pistas de Padel, creo que se contestou por parte de Urbanismo, se lle deu traslado xa fai tempo ao Bertamiráns da situación na que se atopaba o expediente relativo ao Campo das Pateiras. O resto das cuestións miraremos e lle contestaremos.

Pregunta **Jose M. Miñones**: ¿Que prazos hai para a comisión sobre a liquidación 2013?.
Contesta o **alcalde**: A comisión se convoca e pode ir por vía de urxencia ou por vía ordinaria.

Intervén a concelleira **Mª Isabel González Cancela** para formular as seguintes preguntas:

Trixésima primeira pregunta.- Un escrito que presentaron por rexistro os veciños de Piñor o 21 de marzo 2014, pedindo que fixeran beirarrúas. Non se lles contestou.

Trixésima segunda pregunta.- Hai outra veciña de Biduído, que mandou un correo electrónico ao Concello, e de feito lle contestan, dicindo que dan traslado ao departamento de obras. Di a veciña que onde está o bar, no campo da festa de Biduído, se puxo unha marquesiña para os nenos do colexio pero que o paso é moi estreito, e solicita que se busque unha solución, como pode ser meter uns tubos para facer que o paso sexa mais amplo e seguro.

E non habendo mais asuntos que tratar, o señor alcalde presidente deu por rematado o acto e levantou a sesión ás vinte e dúas horas (22:00) do día 31 de xullo de 2014, de todo o que eu, como secretaria, certifico.

Visto e praxe
O alcalde

A secretaria